

吳興金石記

吳興金石記卷七

歸安陸心源伯剛甫纂

宋

胡安定先生墓表

石存

先生諱瑗字翼之姓胡氏其上世爲京兆人後爲泰州海陵縣人先生爲人師言行而身化之使誠明者達昏愚者勵而頑傲者革故其爲法嚴而信爲道久而尊師道廢久矣自景祐明道以來學者有師惟先生暨泰山孫明復石守道三人而先生之徒最盛其在湖州之學弟子去來口數百人各以其口口相傳

授其教□□法最備行□□東南之士□□□
義禮樂爲學慶□四季天子開天□閣與大臣講天
下事始慨然詔州縣皆立學於是建太學於京師而
有司請下湖州取先生之法以爲太學法至今爲著
令後十餘季先生始來居太學學者自遠而至太學
不能容取旁官署以爲學舍禮部貢舉歲所得士先
生弟子十常居四五其高第者知名當時或取科甲
居顯仕其餘散在四方閱其人賢愚皆循循雅飭其
言談舉止遇之不問可知爲先生弟子其學者相語
稱先生不問可知爲胡公也先生初以白衣見天子

論樂拜祕書省校書郎辟丹州軍事推官改密州觀察推官丁父憂去職服除爲保甯軍節度推官遂居湖學召爲諸王宮教授數以疾免旣而以太子中舍致仕遷殿中丞於家皇祐中驛召至京師議樂復以爲大理評事兼太常寺主簿又以疾辭歲餘爲光祿寺丞國子監直講乃居太學遷大理寺丞賜緋衣銀魚嘉祐元年遷太子中允充天章閣侍講仍居太學已而病不能朝天子數遣使者存問又以太常博士致仕東歸之日太學之諸生與朝廷賢士□□送之東□□弟子禮路□□歎以爲榮以四□六月六日

吳興志在烏程本廟熙甯六年朱臨記

黃山谷書黃龍洞三字

石存

輟耕錄其山皆怪石林列山谷先生書黃龍洞三字刻石猶存

何山定化院碑

石佚

吳興志在烏程本院熙甯八年朱臨記

多寶寺題名

石佚

卞山志多寶寺有宋朱氏題名石刻云逢原久中同遊熙甯乙卯季夏初四日題字跡倣顏後有跋云先君居士留題多寶院政和四年五月初二日

謹摹男朱崇謹鐫刻甚工

朱或蘋州可談仲父久中尙奇每倣古物立怪石以紿流俗廬於卞山山多崑谷乃批荆榛求其壯麗者刻作前人題署姓名年號皆詭異既不可據眞兒戲爾

黃龍洞楊景畧等題名

石存

己未仲秋丙午

山白龍洞元豐

以久雨致禱卞

彭敏行陳師錫

楊景畧祖無頗

金井志右三十字在蠓旋室中小楷絕精好凡作五行每行六字從左讀右以黃龍爲白龍益不可解按坡公於是年七月二十八日被攝此則八月間事也

右拓本高一尺二寸廣一尺正書字徑一寸五分案己未元豐二年也楊景畧字康功洛陽人四歲以祖僧蔭守將作主簿十四歲上書皇帝言天下事富文忠弼奇愛之治平二年登進士知壽州安平縣徙開封府推官出點兩浙刑獄六年以宰相

薦召爲左司郎中假左諫議大夫充高麗國王祭
奠使使還稱旨賜金紫擢試中書舍人奏立海神
祠于板橋授龍圖閣待制知揚州元祐元年卒年
四十七見施注蘇詩通鑑長編高麗圖經蘇魏公
公蓋題名時正爲兩浙提刑也祖無頗字夷甫洛
陽人兄無擇宋史有傳無頗以蔭爲江陵府法曹
移廣安軍渠江縣知福州甯德縣舉進士迴改大
理寺丞荆門軍簽判治平四年轉太子中舍熙甯
初轉虞部員外通判婺州元豐二年七月東坡在
告無頗攝守湖州明年爲九江守元豐八年知穎

州元祐元年提點福建刑獄八年卒于杭州見龍
學文集附提刑祖公行狀及淳熙三山志孔文仲
談苑東坡于七月就逮題名在八月正無頗爲攝
守時也彭敏行湖州通判見吳興志陳師錫字伯
修福建建陽人熙甯中廷試第三調昭慶軍掌書
記郡守蘇軾器之倚以爲政軾得罪捕至臺獄親
朋多畏避不相見師錫獨出餞之又安輯其家昭
慶軍者湖州軍名題名時師錫正爲昭慶軍掌書
記也

書記廳集虛堂記

石佚

吳興志元豐三年將仕郎試校書郎權掌書記陳

師錫撰在州治

飛英塔浴院碑陰 石存

釋迦成道記

釋迦如來成道記 太原王勃撰 勸緣知浴賜紫

沙門 師尹 智聰 東海徐稷鐫字

觀夫釋迦如來之垂化也淨法界身本無出沒大悲
願力示現受生泊乎兜率天宮爲護明菩薩降迦毗
羅國號一切義成金國天子選其家淨飯聖王爲其
父玉象乘日示來於大衛胎中金輪作王降誕於無

優樹下現八十種隨形之妙好粲若芬花示三十二
大士之相儀皎如圓月十方而各行七步九水而共
沐一身現優曇花作師子吼言胎分之已盡早證常
身爲度生以還來重垂化跡於是還羈襁褓示類嬰
孩爲占相也悲暢於阿私陀仙往郊祠也驚起於大
自在廟或爲童子或學聲明爲講武也箭塔箭井猶
存爲摘力也象没象坑仍在受慾樂於十歲現遊觀
於四門樂沙門身厭老病死於是澡餅天子以警覺
彰伎女之醜容淨居天子以捧持躍車匿而嚴駕踰
春城於八夜棲雪嶺於六年人辭愴戀主之心馬祇

落連珠之淚揮寶刀而落紺髮塔起天宮將袞服以
貿皮衣形參麋鹿扣林仙之所得了世定之非眞食
麥食麻降苦降樂且夫瑤琴奏曲必自中而曲成佛
果圓因亦假因而果滿由是擇其處也過龍窟沐其
身也入連河示其食也受難隨之乳糜示其座也受
吉祥之茆草以最後之聖體詣菩提之道場圓解脫
之深因登金剛之濃座一百四十之功德不共三乘
八萬四千之法門高超十地由是魔軍威懾於慈力
愁怖旋歸媚女敗毒於定心姬羸變質於是堅牢地
神踊躍以作證虛空天子輾轉而報知類蓮華而出

水赫煥無方若桂月以懸空光明洞澈經七日受持
衛之麩蜜誓以少小之言垂一音受買客之戒歸賜
與人天之福既成佛已觀所化緣悲二仙而不遇雷
音喜五人而堪從佛化然以塵根昧劣聖智淵深順
其法則法不應根順其根則根無達法莫不爲愛河
之所溺緣癡樂之所盲苟不利於當聞仍假言而入
滅於是忉利帝釋雲駐於三十三天堪忍界王霧擁
於一十八梵頭面作禮致敬精專請轉法輪勸隨宜
說如來尋念善逝通規順古佛之佳謨應羣機之韻
欲於是十方佛現同興讚美之詞一法乘分共創塵

勞之域由是起道樹詣鹿園三月調根五人得度憍
陳如悟慈尊之首唱創解標名舍利弗逢馬勝以傳
言於途見諦採菽氏繼踵以師事率門屬以同歸迦
葉氏暈跡以降心領火徒而迴席莫不以甘露洪注
末足普熏天界人界鷲林鹿林或鷲池或鷲嶺或海
甸或菴園或獼猴江或火龍窟或住波羅奈或居摩
竭提或依堅守林或止音樂樹或海濱楞伽頂或山
際補陀巖或迦蘭陀竹林或舍衛國金地或應念而
空現或沒山而出宮或說法假於六方或變身而爲
三尺或掌覆指變或光流佛來或一身普集於多身

或此界便明於他界其間所說阿含四有般若八空
密嚴華嚴佛藏地藏思益天之請問楞伽頂之悟心
萬行首楞嚴一乘無量義大悲芬陀利灑炬陀羅尼
無垢稱之說經須達拏之瑞應本事本身之別諷誦
重誦之殊象馬兔之三獸渡河羊鹿牛之三車出宅
或謂之有守邊中也或謂之無轉照持也或謂之頓
也漸也或謂之半也滿也無小而不大無邊而不中
三乘同入一佛乘三性同歸一佛性真可謂父母孩
孺導師險巇懸朗月於幽霄布慈航於幻海爲雲爲
雨使枯槁以還滋爲救爲歸指窮途於壽域於是所

作已辦功成不居將返本以還源類薪盡而火滅繇
是指力地詣金河光流面門相驚塵刹山搖地動俱
興苦痛之聲異類變容同現奢華之血受純陀之妙
供納毗夜之真言唱四德以顯三伊指萬有而歸一
性酌多羅迦葉四十二請問已周度須跋陀羅八十
一化緣咸畢破十仙之橫計使獲朝聞建四塔之崇
規遐分末葉將欲明有爲之有滅表無相以無生上
昇金剛身往復虛空界日月猶其墜落螢光如何久
留誠有常身使無放逸於是還登玉座首臥鶴林徧
遊三昧之門將復一身之性逆入順入全超半超依

四禪之等持湛三點之圓寂是時也天人叫歸鳥獸
哀號飄風驟雲山吼波逆按輪王之古式方俟葬儀
命力士以捧持竟無能動由是金棺自舉繞拘尸之
大城寶炬不然駐閣維之盛禮莫不未生怨在於王
舍創結夢於十號慈尊大伽葉遠下雞峯將盛禮於
千輻輪足必以兜羅絨氎聖自火焚焚王眾旃檀之
薪河帝釋澡餅之水彼願力猶在悲心尙薰碎金剛
之勝身爲舍利之遺骨於是八國嚴衛四兵肅容各
自捧於金堊競爭興於寶塔於是若牙若髮伽葉波
禮於忉利天宮或炭或灰無憂王建於瞻部洲界若

乃金言道在塵劫法存象王去而象子隨一燈滅而
一燈續莫不大迦葉雲迎千眾阿難陀雷吼三輪商
那表定於未來趨多化壽而滿室始自壞梁之感終
乎流乳之祥瓶器異而水必同燈點殊而光終一是
以大乘之真空妙有文殊彌勒異其宗小乘而分旣
析金上座大眾元其部或十支橫闡或千部鬱興或
馬鳴龍樹繼其芳或無著天親播其美或提婆鑿眸
而作器或陳那吼石以飛聲或百唱齊祛於外宗或
十師翊贊於遺頌或聞經而夜昇兜率或待佛而窟
寄修羅或劍誓首以邀期或象駝金而請譯或賞能

而食邑或得勝以建幢或論般若之理也名燈或究
俱舍之非也名雹莫不殊途異轍終會一源自有及
空皆成萬德自商周見虹貫炎漢夢金人教及神州
聲流華夏見聞盡爾宗致昭然蓋委遺文不復備而
言也乃爲銘曰
化起從本源功成應賢劫萬

行顯眞宗三祇積鴻業爲法出於世降靈示分脅眉
橫天帝弓目帶青蓮葉仙師相垂淚地神驚捧接灌
頂當在宮飛輪化彌帖宗乘天日貴象權師子頰善
教誰與傳抨彈獨豪俠遊觀驚老死踰城棄臣妾落
髮親寶刀貿衣遇羣獫寄跡狎麋鹿苦身示羸怯食

麋人盡知坐草魔方懾潔若蓮出水明逾鏡開匣山
海類高深雲霄等詞捷三時教彌闡萬類根自愜四
句聊欲酌十仙度相躡補處記爲氏遺文囑迦葉臥
樹徒載春香薪已然甍悲人及綿遠舍利光暉陴獨
感生後時餘波幸沾涉

沙門元耀書并題額

大宋元豐五年七月立石於湖州飛英寺浴院 管
內都僧監賜紫永洪寺主賜紫清已副寺主賜紫道
純 沙門曇潤用慈希賢清道子贊省中則端

住報本傳法沙門惠元 攝長史王賓弟子沈沃王
宗簡朱紹宗莫仲雍徐舉莊椿魯詢杭梵忠欽郢吳

眞傳諒欽珙徐覺傳選居震妻周六娘各施財開石
兩浙金石志右碑文正書三十四行行六十四字
額八分書橫列五字在歸安縣飛英寺按王子安
釋迦成道記沙門奉爲圭壁當時所刻惟此僅存
今則董文敏書爲續焰矣又武林紀事錢塘慧悟
大師道誠居月輪山注王勃釋迦成道記丞相王
隨守杭有詩贈之惜未有傳者智聰自題勸緣知
浴石碑立于浴院也

右碑連額高四尺九寸廣二尺六寸字徑六分額
橫列五字字徑二寸此文十六卷本王子安集末

收宋釋延一廣清涼傳有刊本與碑頗有異詩泊
下無乎字天宮作陀天無優樹之優作憂如圓月
十方之十作什重垂化迹之重作今象沒之沒作
跡慾樂之慾作欲麋鹿之麋作山入蓮河之蓮作
蓮以作證之以作而暈跡之暈作彙或海甸之甸
作殿或掌覆或流光下皆無而字伽山之悟之悟
作語守邊也或謂之無轉守邊作守中轉作搏滿
也下多無說而常說四句布慈航之慈作舟於是
所作於是作暨乎血受純陽之妙妙作後共納毘
夜之眞眞作蜜必以之必誤畢四兵肅容兵作岳

華夏下多勃叻生季世四句豈延一有妄增歟抑

石刻有刪削歟

蘇軾游法華山詩 石佚

孤城文獻嘉靖八年土中掘出一碑乃東坡贈賈
耘老與胡祠部游法華山詩也末云宋淳祐癸卯
上元日住持僧師檜立石寺中

法華寺紀畧蘇軾游法華山詩碑刻已損尙存數
十字在齋堂後壁

廳梁題字記 石佚

吳興志元祐二年知州事林希題在郡治

銷暑樓記

石佚

言七

十二

吳興志在樓南面元祐五年知州事呂溫卿撰并書

鳳凰橋題字

石存

清信弟子□敏□家眷

下缺

施財建造石橋一所

下缺

利益伏用報益四恩三□□□

時元祐五年歲在戊辰二月二十

二日題

石匠宋□貴

石高二尺五寸廣一尺四寸五行在郡城北飛英

塔前

蘇東坡青蓮峯題字

青蓮峯 東坡居士 元祐六年三月三日

右磨崖高二尺廣一尺五寸正書字徑六寸款字
徑二寸五分在法華山白雀寺後案王宗稷東坡
年譜元祐四年三月累章請郡除龍圖閣學士知
杭州六年三月被旨赴闕又參寥泉銘序云予以
寒食去郡以此題推之東坡去郡當有法華之遊
由杭至湖不過一日程此正去杭之日所題也

寶章法帖 石佚

〔吳興志〕元祐中劉燾被旨摹刻在墨妙亭

案此卽元祐祕

閣續帖

林槩長興雜詠 石佚

〔吳興志〕元祐中子希知湖州刻於墨妙亭

褚令摹蘭亭帖 石佚

〔蘭亭考〕蘭亭徐滋本在湖州瘦勁而皴剝自十七十八行內有大裂文

〔輟耕錄〕宋理宗集蘭亭刻一百七十本裝褙十冊藏之內府乙集內有安吉古苔眞草丙集內有古雪斷石本辛集有劉無言臨本癸集內有趙菊坡

本此四本皆吳興之妙

羊欣宋翼二帖

石佚

寶章待訪錄宋羊欣宋翼二帖并褚令撫蘭亭石見中書舍人口口蘇軾云羊欣帖在故相隨之孫景昌處撫石在湖州墨妙亭屢見石本

脩架閣樓記

石佚

吳興志碑在州治樓下元祐七年左承議郎簽書節度判官廳公事朱振撰

蘇軾龍洞禱晴和孫同年莘老詩

石佚詩見東坡集

輿地紀勝黃龍洞在烏程下山石壁峭立巖竇陰

沈莫窮其底蘇軾有刻

〔張審卿荅記〕東坡下山龍洞祈晴一詩當時刻置龍洞後移置墨妙亭至正德中太守呂盛爲之題跋印布四方今其石猶存廳事後堂

東坡六客詞

石佚詞見東坡集

〔吳興志〕元祐六年撰在墨妙亭

黃山谷書范滂傳

石佚

〔程公許滄洲塵缶編〕題墨妙亭詩原注墨妙亭使君新命工摹刻山谷所書孟博傳於顏蘇帖之石

蘇軾半月泉題名碑

石缺據舊拓本載

蘇軾曾輔劉季孫鮑朝樞鄭嘉會蘇固同游元祐六年三月十一日請得一日假來游半月泉何人施大手擘破水中天 東坡

上缺 紀游舊碣向口秦口中越四百年而余來令邑滿六載甫屬覺海僧以眾捨新亭泉上重募舊刻置之壁間長公墨妙隨地見珍矧吳興舊治豈令茲興終闕物故有遺口者玉塵山靈於今大有遺矣

兩浙金石志右碑上截刻題名下截年月後刻紀游詩一首詩後有跋文六行乃明萬厯間重刻也此詩案查注云諸刻不載見談鑰吳興志石刻在

慈相寺巾余家有搨本按先生自杭守召還在元祐辛未集中有三月六日別南北山諸道人詩與半月泉題名相距才五日當是還朝時便道來游歲月鑿鑿可據而此詩本集失載詩與題名大小不同迥出兩手疑後人因題名而贗作此詩蓋先生時方還朝何云請假以此辨之其爲假托未可知也徐志莘跋云筆勢及詩句非他人所能仿一日假者乃郵程假也碑雖重刻而筆勢不失云云二說互異姑存俟考未有明令重刻跋語初自未之見也劉景文名季孫開封祥符人壯閎公平之

子以左藏副使兩浙兵馬都監駐杭州曹輔字子
方海陵人自太僕丞爲福建轉運判官後六客詞
子方共一也二人與文忠倡和甚多見本集蘇固
或卽伯固亦見集中

八勝寺三世佛碑

石佚

吳興志三世佛碑石曼卿書在德清本寺彌勒像
前

八勝寺記

石佚

吳興志在德清本寺皇祐間重建山門兩廊記阿
育禪師懷璉作奉化知縣沈時升立石

歸安縣令題名碑

石佚

吳興志縣令蔡瑗序紹聖丙子楊郊刻石

曹孝子祠堂記

石佚

吳興志劉燾撰刻石祠中在州治

通靈王廟記

石佚

吳興志在郡治甘棠橋廟中元符元年知州事豐稷重修郡人姚舜仁撰記題曰重修通靈王廟記

重修德清至聖文宣王廟碑

石佚

吳興志直史館陳堯佐撰在學

朱將軍廟記

石佚文見仙潭文獻

仙潭文獻在德清元符二年十月望太史章撰

齊政院記

石佚

吳興志在德清元符中靈芝元照撰

葛清孝公仙潭雜詠

石佚

吳興志在墨妙亭

德清縣志宋葛書思宦游新市鎮敘其暇日所作
刻于石

案葛書思爲勝仲之父慕容彥逢撰葛公墓志書
思字進叔江陰人以吉州司戶參軍監湖州新市
務遷朝奉郎致仕

覺海寺山門佛殿記 石佚

〔吳興志〕建中靖國初太史章撰在德清

達光亭記 石佚

〔吳興志〕邑人劉士英記有石刻在武康

湖州武康縣學記 石佚

〔勞鉞湖州府志〕宋建中靖國元年毛滂記勒於石

湖州武康縣淵應廟記 石佚

〔勞鉞湖州府志〕勅賜淵應廟碑宋建中靖國間毛

滂作

福慶院詩刻 石佚

吳興志在武康院有翠屏軒秀嶽亭毛滂有詩刻石

東禪寺記

石佚文見吳興掌故集

吳興掌故集在安吉魯伯能撰

安吉重修放生池記

石佚文見吳興掌故集

吳興掌故集未知德清縣胡淦明撰

仁濟廟勅牒碑

石存

賜額勅文

尚書省牒湖州安吉縣仁濟廟

禮部狀承都省送下兩浙轉運司奏據湖州申據安

吉縣申承宣德郎致仕俞純父等 狀本縣落石神
祠舊有碑碣稱唐李衛公血食於此立廟以來官私
凡有求禱無不響應乞保明申 朝廷乞賜封號本
司審覆保明詣實尋下太常寺看詳本寺檢准 令
節文諸神祠應旌封者先賜額本部欲依太常寺申
到事理施行伏候指揮

牒奉

勅宜賜仁濟廟爲額牒至准

勅故牒

崇寧三年十一月二十九

同登日牒

中大夫守右丞鄧元

中大夫左丞張方

司空左

僕射

丞事郎知湖州安吉縣管勾學事兼內勸農公事劉望立石

右仁濟廟勅牒碑在李王山本廟高四尺五寸廣三尺額高一尺廣一尺題賜額勅文四字字徑三寸碑首行字徑二寸牒奉一行牒字徑三寸五分奉字徑一尺勅宜賜一行勅字徑六寸下十字徑各三寸許勅故牒一行勅字徑六寸故牒二字徑三寸署銜一行字徑一寸四分末行署銜字徑八

分文云據湖州申據安吉縣承宣德郎致仕俞純
父等狀本縣落石神祠舊有碑碣按周紫芝有吳
興道中過落石祠詩落石祠之名其來舊矣至是
勅賜仁濟廟額從俞純父之請也純父烏程人熙
甯三年葉祖洽榜進士司空左僕射者蔡京也崇
寧二年正月丁亥京自右僕射授右光祿大夫除
左僕射見宰輔編年錄中大夫守右丞鄧者鄧洵
武也中大夫守左丞張者張康國也編年錄三年
九月乙亥張康國自翰林學士承旨知制誥遷中
大夫除尚書左丞鄧洵武自刑部尚書遷中大夫

當于景祐四年四月以職方郎中知湖州明年三月卒于任鮑軻子嘉祐六年以度支郎中知湖州十月到任七年六月移知台州今石刻云度支郎中鮑公嘉祐七年壬寅來守吳興留題名字是鮑軻而非鮑當明矣朝賓爲鮑軻之子而非鮑當之子亦明矣惜鮑軻林希所題之石已不可見耳軻永嘉人天聖五年進士湖學建自宋寶元間賜田五百畝養士不給軻知州事開秀州楊涇有民訟田連年不決者官將兩奪之乃貽書轉運使貸錢六十萬得田七頃一十九畝歲得租米三百二石

教授沈揆祠之于學與胡瑗滕宗諒朱臨胡宿並
號五先生祠後又別祠安定而益以顏真卿蘇軾
王十朋稱七賢祠見談鑰吳興志及浙江通志軻
與顏胡蘇諸人並祀其賢可知郡志名宦不爲立
傳亦缺典也

銅爵款識

皇宋湖學

右爲歸安貢生王思儼所藏篆書四字湖州新建
州學在寶元二年時鑄此爵以行酌獻之禮張方
平所記罍器用幣釋菜成禮是也

縣令許祕丞長興利便事碑

石佚

〔吳興志〕在縣治

修謝太傅廟碑

石佚

〔吳興志〕在長興縣南三鴟岡本廟治平四年知縣

吳濤作

錢敞墓碑

石佚

〔吳興志〕在長興雉山西南墓柱題曰漢祠部郎錢

府君之神道

謝太傅墓田碑

石佚

〔輿地紀勝〕謝安墓在長興三鴟村有大觀三年墓

田碑墓柱題云東晉太傅文靖謝公之墓

〔吳興志〕大觀三年立在謝太傅廟

飛雲堂詩刻 石佚

〔吳興志〕廣福禪院在長興縣西合溪崇觀間僧元禮作飛雲堂劉燾有詩刻

顧渚山劉燾等題名 石存長興邢志誤作劉春

□□趙□劉燾同來大觀四年四月□日

〔兩浙金石志〕右題名四行行四字正書徑一寸在長興縣顧渚明月峽唐楊漢公題名左側摩崖劉燾字無言長興人

進士題名記

白佚文見
長興縣志

顧應祥長興縣志長興進士題名記朱劉燾撰政
和五年十二月立石

男
樹藩校字

吳興金石記卷八

歸安陸心源伯剛甫纂

宋

安吉縣新修東岳行宮碑

石存

湖州安吉縣新建 東岳天齊仁聖帝行宮碑

宣德郎監常州犇牛鎮務兼煙火公事彭修撰

登仕郎守安吉縣丞管勾學事丁齊書

朝奉郎新差權發遣秀州軍州管勾學事兼管內勸

農事雲騎尉借緋魚袋劉藻題額

五方皆有名山以作鎮其東曰泰山穹隆巖嶽崑崙

錦鬱睥日睨月軼雲帶霓岌然拔立以傾天下之心
目又曰天孫爲天帝之孫又曰岱宗言東方萬物始
交代之處其上有金匱玉策知人壽命短長威神所
被震燁有耀宗長羣岳會朝百靈夫居杳默冥漠之
間察天下善惡之萌蘖而禍福之是必其聰明正直
有以運精神之妙參造化之機故能旋轉乾坤開闢
宇宙指揮風雲呼吸雨暘潛行密移變化莫測傳曰
山川有能潤百里者天子秩而祭之觸石而出膚寸
而合不崇朝而雨徧天下者其唯泰山乎自古聖王
莫不光昭祀事稱封禪之君七十有二秦漢以降窮

寵極崇於赫

我宋誕膺顯命

藝祖

太宗聖文神武不假戈革混一區宇民脫五季之毒
螫復見三代之風流

真宗繼承鴻緒用底丕平封泰山之高以報天禪梁
甫之趾以報地剖天神符合地靈契卜年有永卜世
無疆

聖聖繩繩炳炳煒煒

今皇帝稟睿聖之資丁熙洽之運以孝事

神考而紹丕顯之謨以弟事

哲宗而述丕承之烈歡交三神道力百王上暨日月
星辰下至山川草木幽及鬼神微逮蟲魚罔不用又
內自九州外薄四海延頸企踵以承教化生民以來
大平之盛未之間也惟天祚我 國家昌明隆

熙沕漭漫羨故其昭報虔恭寅肅唯恐或後於時山
川之載在祀典者泰山爲最尊貴名號視上帝且天
下咸得祀之雖窮山幽谷要荒不毛之地皆飾祠嚴
奉湖之安吉羣峯回環峪嶢嶢嶸嶸長溪縈帶靡迤溶
漫地富絲泉人用饒益豪商傑賈萬里輻輳爲東南

大邑宜其架構凌歊多侈宮室繡楹雲栴螭蜺蛟漢
以妥安神明而曾無尺寸之地仍歲聚浮薄爲社送
迎而已顧瑣陋不稱跨溪而南有金仙氏之居曰等
慈民嘗立嘉應侯以祀之後更塑 岳帝之像

祈答響召如谷應聲川航陸乘肩摩足疊寺僧戒遇
啟思以佛祠非 岳帝之所宜居迺施寺西之

地俾經營之民大和會相與鋤治鑿山構基始得圓
石背隆而窟渾然天成不見痕跡上有七星列若斗
柄其次二星如相先後而拱於上其次四星兩兩相
比考之傳記星隕於地化而爲石實天以啟於民衷

非人能悉厥謀地不愛寶發現於外以表休祥貴賤
聳觀遠近慢聽貧者施力工者薦巧靡由號召莫不
畢至崇甯丙戌夏六月洪水暴漲是用不潰於成因
廢爲荆棘瓦礫之場虹梁彫焚丹髹浸剝華墀卸砌
圯缺斯蕪楣顛樞仆垣傾城夷歲時水旱疾疫縣官
與邑之士民凡有禱請必造其下載瞻神靈居處不
虔迺相與而言曰生人何依惟神是恃福我壽我衣
我食我夫夫婦婦父子子兄兄弟弟神之所以庇
祐生人者旣已厚矣而我報不虔神雖莫我悔咎我
甯不愧負厥心於是相率復踵前功凡爲三門兩廡

中大殿一寢殿一旁小殿二爲壇一爲池一高下相望如翬斯飛塗金間碧璘珣璀璨繪畫鬼神羅列四壁焜煒瀟□若視若言貪愚險狠顧瞻讐慄天旄星旂天矯配藜耽耽渠渠翼翼嚴嚴過者下登者拜

明明岳帝如在上下如在左右於是祝史跪而告於令曰惟令在公盡忠教民以孝忠孝之誠格於上下故時和歲豐民康物阜伊宮之成惟民之力實令之德令承事郎劉望以語修曰是宮建於元符庚辰十二月己酉通直郎龔羣經其始成於政和壬辰十一月壬申望落其終董役辦事者施華范守瓊俞

仲甯范天式施徽等自庚辰迄於壬辰春秋凡十有三比年以來時和歲豐神之祐於我

國家也

民康物阜

上之所以敷錫厥庶民也祝史不知迺歸德於望甚無爲望何德以堪之望嘗詢作宮之意於民咸曰將祈福於神以報于

上俾磐石之基不拔日日新又日新於萬斯年爲天下主望惟天保之詩曰天保下報上也君能下下以成其政臣能歸美以報其上望不肖獲見民能報

上比隆成周實與榮焉於是相與率賓僚齋心潔誠

諏日之良造於宮庭大合樂以落之金石絲竹鐸鐃
鏘洋牲牷酒罄神其醉飽祥氛郁郁以顯 帝

靈飛廉斂□屏翳肅馭乾端坤倪清明沆寥神斯盼
蜚人心載欣修汾檄來茲亦更三時聿觀厥成獲與
在列謹拜手稽首而敘之既敘之又爲之詞以遺邑
人使歲時薦獻歌以祝 帝詞曰

於穆

皇帝紹休

七聖兮垂拱南面庶政清淨兮仁洽道豐品物涵詠
兮百神受職四方無競兮鄣山蒼蒼若溪沄沄兮中

建

靈宮揭虔妥靈兮風馬雲車

帝狩

於庭兮鳳蓋勢離龍旗崢嶸兮

帝佑

皇帝永主神器兮以臣以妾罄天亘地兮珍符靈祥
日升川至兮授策泰元壽萬萬歲兮

帝惠我

民時和歲豐兮多黍多稌十雨五風兮稍魑扶狂蕩
穰災凶兮孕臯生夔躋世熙隆兮蕩蕩下土

帝司其職兮蚩蚩之民孰知

帝力兮

明明岳帝聰明正直兮欽我民祀與

宋無極兮

政和三年歲次癸巳壬寅朔建 承事郎知湖州安

吉縣管勾學事兼管內勸農公事劉望立石 守杭
州助教范天口施財住持管勾御前賜紫道士虞輔眞
表白賜紫戴尹方

兩浙金石志右碑文正書三十六行行八十字在
安吉縣按祠初祀於等慈寺寺僧戒遇施寺西地
經始之發地得七星石貴賤聳觀垂成而潰於崇
甯丙戌之水凡禱祠者猶至於是復踵前功而歸
美於令厯歲凡十三年而彭修文以記之洋洋數
千言洵稱作手結銜有煙火公事又見紹興十年
永靈廟碑蔡几銜及唐安隱寺經幢後紹興庚辰

題記李械銜上

右碑高七尺八寸廣四尺案丙戌爲崇甯五年宋
史崇甯四年蘇湖秀三州水賜乏食者粟五年夏
四月丁丑停免兩浙水災州郡夏稅不言六月水
災史失書也鑿山得石上有七星列若斗柄宋史
五行志亦不載兼管煙火公事者宋史職官志七
諸鎮于管下人煙盛處設監官管火禁或兼酒稅
之事彭修爲奔牛鎮監稅例管火禁故以入銜職
官志又云兵馬都監兵馬監押掌煙火公事捉捕
盜賊曰火禁曰煙火公事辭異而義同也徽宗崇

尙道教道士有賜紫者有賜師號者其畧見楊仲
良長編紀事本末崇道學門職官志屢及伎術官
而不詳名目勾當御前表白蓋皆伎術官之名也
廣化寺瑞閣記 石佚

吳興志碑在州治木寺政和五年縉雲葉夢得撰
并書信安程俱題額

聖壽院殘碑 石佚

寶前志畧在歸安縣南射村明吳宗義掘得半截
碑乃真武像上勒神咒旁有政和年號

重修縣宇記 石佚

〔吳興志〕在德清縣小廳宋宣和初鄭知幾撰

趙知縣生祠記 石存

〔吳興志〕公諱蝟字景東三衢人宋宣和初知德清縣既去邑人德之立生祠碑記刻石德清乾元寺鄭閒靖月泉題名 石佚

〔德清縣志〕宣和庚子仲冬六日鄭知幾與沈彥居吳子常周美中同游慈相寺月泉刻石寺壁

羅漢禪院記 石佚

〔吳興志〕在德清明因院

法鑒講師若愚塔銘 石佚

吳興志在德清覺海寺

孔耳石題名未見據舊拓本載

少蘊無言慧覺道人宣和癸卯四月辛亥同來

雨浙金石志右題名三行行六字正書字徑一寸

餘左行在長興縣丁氏傳爲石林故物其石高四尺許形如人耳色黑而水紋甚細葉夢得字少蘊本吳縣人清臣曾孫晚年致仕居吳興卞山自號石林居士有石林集無言劉燾之字慧覺當是同游方外交也無言以書法名世書史云黃山谷題其續法帖云劉燾箋題便不類今人書使其春秋

高江東又出一羊欣矣此刻用筆圓熟似李北海
出無言手書

德清縣重修孔子廟碑 石佚文見龜溪集

吳興志在學

烏程縣烏墩鎮普靜寺觀音閣銘并序

石佚文見葛勝仲丹陽集

明唐一夔記云寺故有碑其在靈臺之東者宋端
平敕額完好無恙其在西者歷年滋久字多漫漶
不可識

圓義禪師塔銘

未見文見烏青鎮志

烏青鎮志宣和五年十月五日立在圓義菴西偏

慈感敎院珠羅漢記

石佚

〔吳興志〕院有珠羅漢湖州邵宗益剖大蚌得之建
閣藏焉劉燾有記刻石寺中

石曼卿經史閣三字

石佚

〔吳興志〕在州學

石曼卿敕建州學四字

石佚

〔吳興志〕在州學

劉燾稽古閣三字

石佚

〔吳興志〕在州學

玉筍

石佚

靜志居詩話 白雪廉吏守湖州時爨薪不給課童
僕刈後園豐草折枯樹以炊拾得石一片上有玉
筍二字其旁題識已滿乃宋元豐間物笑曰太守
落落如此石石應太守將去及遷秩載之以歸置
香雨樓間至今尚在也

歷年圖碑

石佚

畫錦堂碑

石佚

吳興志 並在安吉縣學韓磊刻

林槩詩刻

石佚

吳興志 花渚在安吉梅溪鎮吳可幾知幾作堂其

中號二吳讀書堂長興令林槩作詩刻其內

寶書橋題字

都勸緣修職郎前監行在車輅院章□ 勸緣文林
郎新監臨安府都鹽倉吳垌 勸緣文林郎前奉國
軍節度推官章□ □施財建橋寶溪社人施□□
右拓本高三尺七寸廣一尺二寸在歸安西南射
村案吳垌興國州永興人祖中復宋史有傳父則
禮著有北湖集垌紹興十三年七月爲樞密院編
修官八月提舉浙西茶鹽十四年十二月爲兩浙
運副累官直徽猷閣知荆南府二十四年以憂死

見繫年要錄咸淳臨安志文林郎從八品樞密院
編修正八品此橋蓋垵未爲編修時所造雖年號
已缺其在紹興十三年以前無疑也其後尙有寶
祐大德泰定題名皆重修時所題耳

重修德清縣孔子廟碑

石佚

〔德清縣志〕在學紹興三年邑人沈與求撰鄭如幾
書

東嶽行宮記

石佚文見仙潭文獻

〔仙潭文獻〕在德清紹興四年甲寅春三月甲子姚
穀撰

縱雲臺記

石佚文見茗溪集

吳興志在德清縣署劉一止撰刻石臺上

永靈廟勅牒碑石存

尚書省牒湖州新市鎮永靈廟

禮部狀准都省批送下兩浙轉運司奏據湖州申准
禮部符據湖州新市鎮父老陳修等委見土地保甯
將軍近自方賊等作過陰助並無驚擾民獲安堵乞
降廟額尋下德清縣勘會靈應事跡今據德清縣申
勘會得土地保甯將軍靈顯保明詣寶州司保明詣
實乞依條施行本司遂委右迪功郎就差秀州嘉興

縣主簿沈柄體訪詢究據沈炳申體訪委有靈應保
明詣實本司再委右朝奉郎本司幹辦公事朱正剛
覆行按實朱正剛申體訪得禱求皆獲靈感保明詣
實本司保明亦委詣實前批送禮部本部尋行下太
常寺勘會去後今據本寺狀檢會已降指揮節文神
祠未經封爵者如有靈應卽先賜額今來兩浙轉運
司保奏到湖州新市鎮土地保甯將軍祈禱靈應依
所降指揮會先賜額本部欲依本寺所申事理施行
伏乞

朝廷詳酌指揮伏候指揮

牒奉

勅宜賜永靈廟爲額牒至准

勅故牒

紹興五年 月

日牒

參政知事沈

尙書右僕射同中書門下平章事

尙書左僕射同中書門下平章事

兩浙金石志右碑牒文三列首行後有禮部申狀

十八行是行書在德清縣新市鎮按舊志神姓朱

諱泗父煦三國時朱然之弟從軍于司馬氏部下

晉咸甯中伐吳煦妻從行伍至鎮婉焉江左立國
神往應募永昌元年王敦反冒陣而亡泰甯二年
追封鎮國大將軍此申據文第稱保甯將軍青溪
之擾陰獲神佑而已按建炎三年正月有古跡靈
神顯應去處許州縣奉聞加封冊額之詔自此踵
事而起者在在有之矣

右碑分三列第一列禮部申狀十八行第二列牒
文第三列年月及署銜年月一行字徑一寸四分
參知政事一行叅字徑三寸四分知政事三字徑
二寸尙書右僕射兩行字徑一寸五六分不等案

參知政事沈者沈與求也尙書右僕射同中書中
下平章事者張浚也尙書左僕射同中書門下平
章事者趙鼎也宰輔編年錄紹興四年九月甲戌
沈與求自試吏部尙書兼權翰林學士遷中大夫
除參知政事六年二月癸亥罷爲資政殿學士知
明州張浚自知樞密院授左宣奉大夫守右僕射
同平章事七年九月罷五年二月丙戌趙鼎自右
僕射授宣奉大夫守左僕射同平章事六年十二
月罷與求浚鼎宋史皆有傳

永靈廟加封勅牒碑

石存

尚書省牒湖州德清縣新市鎮顯佑侯

禮部狀准都省批送下兩浙運司奏據湖州德清縣新市鎮父老市戶陸修等狀竊見本鎮土地保甯將軍自方臘等作過陰功護助並無驚擾得獲安堵准敕賜永靈廟爲額又於紹興七年七月大旱詣廟祠祈求不及旬日果霑霖雨及紹興八年二月久雨連縣又建道場卽時賜霽委有靈應於民乞封爵號本司遂委右迪功郎秀州崇德縣主簿曾怱躬親詢究及再委左從事郎添差本司准備差遣元益覆行按實所陳靈應委是有功於民事跡顯著本司保明詣

實尋行下太常寺勘會去後今據本寺申今來雨浙
運司保奏到湖州德清縣新市鎮土地永靈廟保甯
將軍每遇亢旱及大雨連縣祈求靈應乞封爵號本
部今欲依本寺所申事理施行伏乞

朝廷詳酌指揮施行

牒奉

勅湖州德清縣新市鎮土地永靈廟保甯將軍惟神
之靈覆護一方曰雨曰暘隨禱而獲肆加顯號用答
殊休永佑我民歆于世世宜特封顯佑侯牒至准
勅故牒

紹興九年五月

日牒

參知政事李押

參知政事孫押

尙書右僕射同中書門下平章事押

兩浙金石志右碑牒文四列俱行書首列禮部申
狀十八行正書在德清縣新市鎮保甯將軍紹興
五年賜額永靈此于六七年間旱潦之應復請封
號加爵顯佑也惟神之靈云云間作詰體知當時
體制不必盡同自是而後慶元二年加封顯佑通
應侯端平三年加顯佑通應惠利侯敕并見後明

沈叢穀永靈西廟記又言慶元二年封神妻協惠夫人兄進封靈威公夫人加昭慶順應助吉世子封保慶嘉濟永昌侯宋敕現存無封妻子事皆未見諸敕也

右碑分四列第一列禮部申狀十八行字徑寸許第二第三列牒文六行行五字字徑二寸三分第四列敕故牒一行年月署銜四行敕字徑六寸故牒二字徑二寸許年月一行字徑一寸許參知政事兩行參字徑三寸餘皆一寸七八分尙書右僕射一行字徑一寸許案叅知政事李者李光也叅

知政事孫者孫近也尙書右僕射同中書門下平章事者秦檜也宰輔編年錄紹興八年十一月甲申孫近自翰林學士承旨除參知政事十二月李光自吏部尙書除參知政事八年三月壬辰秦檜自樞密使除左宣奉大夫守右僕射同平章事兼樞密使曾慥江西南豐人祖鞏宋史有傳慥建炎中以兄恂殉節越州蔭將仕郎見宋史忠義傳紹興七年旱八年雨宋史皆不載不成災也

永靈廟土地顯佑侯碑

石存

湖州德清縣新市鎮永靈廟土地顯佑侯記

夫惟天下之大四海之廣曰山曰川曰城曰野必有
神以主之有爲淫厲者有施利澤者爲淫厲則苦於
民而嘗祀固不能繇遠施利澤則感於民而時祀殆
歷悠久者也愚嘗聞諸長老考諸舊記

土地顯

佑侯利澤加於民至矣爲人則力救大旱爲神則德
芘生民宣和靖康間顯靈以攘寇盜保土以弭凶荒
時遇雨暘札瘥人咸禱之禱無不應應無不驗其清
災轉禍不可勝紀民今實受其賜則民豈易忘耶祠
宇落成于有晉鎮于鎮之震位俾民有所祈獻來者
輻輳周邦曾益其所爲規模崇大由是苻祥不一動

應無方乃獲封號保甯士民景仰祭愈克誠今由始也後以風俗浸廣強勝日生別有所建立者華靡之風使之然也殊不知神之佑民皆吾民也豈一境土而分禍福哉神亦知其爲心故不待盡言曷容以浮辭飾說厚誣於衆也神之感應如響鄉老編其功績告于所隸官覈其實敷奏于

朝紹興乙卯得賜廟額永靈自茲護我實多隨又切陳之紹興己未蒙謚侯爵顯佑於戲侯之積功累德宜其大賚感

當今之寵錫敢謂無德以將之信知列于典祀永享

廟食可期不朽也歟與進然爲星之晚生荷神之休
願傳世世謹以記之紹興十年三月望日邑人孫與
進記玉京田約書并題額

承信郎薛理 保義郎孫珣 承信郎添差鎮稅趙

不處 秉義郎添差鎮稅聶皋 右宣教郎監湖州

德清縣新市鎮稅兼煙火公事蔡凡 右迪功郎縣

尉魯可封 右迪功郎主簿王勣 左從事郎縣丞

陳一鶚 左承議郎知湖州德清縣主管勸農公事

劉嘉成

兩浙金石志 右碑正書十九行題額勅賜顯佑侯

記六字亦正書在德清縣新市鎮此因前五年賜額九年加封邑人孫與進紀事之文也文云祠宇落成于有晉是仍舊志謬悠之說又云爲人則力救大旱爲神則德芘生民則生時必有實績昭著當世有能言之者此保甯之稱所自來而明沈戩穀永甯西廟碑又謂周廣順間封保甯將軍此又一說也題名惟劉嘉成紹興七年任著於錄餘皆不傳

長興縣令新廳事碑

石佚

吳興志在長興縣治紹興八年縣令張琮始裒聚

宋朝太平興國以後縣令姓名刻石實於廳事

梵慧院記

石佚

吳興志寺在長興縣西四安鎮有江東汪用汝記

五酉季王廟記

石佚

吳興志在長興合溪鎮賢良祝鑑爲記以爲五酉有吳之訛季王季札也

玉寶泉記

石佚

吳興志玉寶泉在長興落陽深廣皆二尺色紺碧味甘唐處士鄭澈與道士李道殷羅隱築室於泉口號三隱紹興中侍郎錢伯言有碑

顧渚山汪藻等題名 石存

龍圖閣直學士前知湖州

□□汪藻新知無爲軍括

蒼□□祖知長興縣安肅

張琮前歙縣丞汝陰孟處

義前監南嶽廟吳興劉唐

魯紹興戊午中春來游右

承務郎汪悟汪恪從行

以上七行
入分書

□□徐茂

刻字□明

口作頭符端

以上三行小字正書在從行下

兩浙金石志

右題名七行行十字八分書字徑二

寸末行下有小字三行似刻工姓名磨滅難辨在

長興縣顧渚山明月峽

俗稱顧渚潭

西崖仰石摩崖宋

史文苑傳汪藻字彥章饒州德興人崇甯中第進

士紹興二年除龍圖閣直學士知湖州請修日歷

旋以事貶秩復起知撫州又爲言官所論予祠至

六年復詔纂修日歷賜史館修撰餐錢聽辟屬編

類八年書成上之遷顯謨閣學士尋知徽州其屬

鮑延祖孟處義咸增秩有差今題名藻系銜龍圖

閤直學士前知湖州與傳合而戊午紀年正屆書
成是藻子祠後嘗寓長興之龍灣纂修卒業放懷
山水故所著有龍溪集又按淳溪集載吳興何氏
書堂記云予老矣方買田若溪之上時爲紹興十
年十月距成書又逾二載是其人寓長興之明證
也今譚志於寓賢條內刪去藻名並未言其未嘗
留寓於此可謂失考之甚石刻括蒼下

缺二字應是

鮑延祖署銜新知無爲軍當是書成後所授新秋
張琮長興縣令志未載年月里居可據此補之劉
唐稽字林宗樞密珏之子也少守家學顏其齋曰

養浩彥章爲之記并薦於朝後擢守常州

右磨崖高三尺五分廣二尺一寸六分案茂字作頭特端四字兩浙金石志皆缺鴻慶居士集顓諫閣學士汪公墓誌稱藻大小二篆得李斯陽冰用筆意題名八分頗有漢意必藻所書也藻八子第二子悟紹興二十五年累官右宣教郎婺州金華縣丞乾道九年右朝奉大夫知袁州第三子恪累官右承事郎見孫觀所作汪公墓誌江西通志

靈應廟碑記

石佚文見東林山志

東林山志

紹興十六年二月二日前進士左承直

郎權通判常州軍州主管學事兼管勸農事借緋
魚袋里人沈長卿撰左迪功郎新嚴州分水縣尉
兼主簿主管學事巡提私茶鹽礬里人倪偁書并
篆進士沈繹之立石

報恩光孝禪寺新建觀音殿記

石存

新建

觀音

篆文字大五寸餘

吳興報恩光孝禪寺在郡治東北地勢亢爽土木雄
勝門序殿舍齋宮宿廬規制井井宅伽藍莫及蓋陳
永定中后家捨宅建焉初曰龍興後曰孝義至唐復
爲龍興吳越錢氏易爲大甯目其女爲比丘尼遂爲

尼宮幾二百年

本朝崇甯二年始復爲十方禪

刹曰崇甯萬壽禪寺後又易崇甯爲天甯紹興七年
更賜今額恭爲

固陵薦靈社也舊有觀音大士像在寺西偏兩楹之
間郡人張氏病痿三年一夕夢白衣女子告曰若臂
不舉耶吾亦苦此能拯吾臂吾亦拯若臂且壽若矣
張問所居則曰居天甯西廊翌日張輿掖詣寺得大
士像如夢所覩瞻仰感涕察大士右臂爲墜木所傷
命工拯之張病隨愈自是郡人歸心目疾痛苦厄求
拯者不下數十應感事跡不可疏舉而所處閭陋迨

迫不副人意今導師屈久與其徒慧智募衆出財謀
建別殿奉安妙相而患棟榦之偉求之山林未易得
日月冀或告之曰近郊曰寶溪者有故侯第今去弗
居盍往圖之慧智亟往則其家已先見夢告于其主
欣然許焉於是卽廊之前左建殿屋四楹前爲複廊
與旁兩廡深明壯麗具妙壯嚴蓋前住持經畫累歲
而不克成者道俗歡喜竦誦讚歎咸若有所依歸久
目其事求記於余呂侈其成余曰我聞觀音大士性
相等空無刹不現身光互涉有感必通於諸衆生悲
心不捨是故身爲三十二應同事攝化利益見聞且

我之身與子之身一爲比丘一爲居士俱在三十二
應之內真源實際視此大士爲二爲一爲同爲別曰
是思惟大士衆生體本圓成無二無別曰無二無別
故隨彼衆生心想所感周徧無遺則是大士非但無
我亦無我所而子獨曰像設區宇爲所依歸則利益
衆生爲有擇歟久曰不然大士身相無邊固無我所
而彼信士心想鄉慕則有所矣我觀道俗至前攝衣
俯偃炷香膜拜陳其疾痛苦厄種種希求之狀誠意
口激汗泚顏間言出肺肝感通夢寐初若一體我是
曰崇其鄉慕之所爲之莊嚴曰益其信心若彼信心

一念回光觀色明空入佛知見則□大士不起于坐
周徧十方在在處處無非道場而此道場實無所 在
利益眾生亦無受者如我所說 爲有擇歟爲無擇歟

如是問答亦無實義余曰是名實義是名大士悲心
救物無二無別于言倡矣 是用識之始於□□□□

□□□□□□戊戌於二十七年四月庚戌太簡屋
士劉一止記并說偈言

我聞大士觀世音 具大功德□莊嚴

初從聞中入三昧 聞盡覺空空亦滅

惟有一念悲眾生 三十二應爲說法

法施無盡身無邊 周徧十方河沙土
毘陀羅臂如虛空 云何示此疾痛緣
以衆生痛我亦痛 究觀起滅無處所
偉哉寶殿嚴眸容 清淨絢麗光奪目
惟導師久善方便 謂彼衆生心想殊
要令觀想生實解 入佛知見如指掌
在在處處皆道場 而此大士實無在
一一衆生蒙利益 亦無受此利益者
我知信施及見聞 決定同證無上道

碑陰

光孝禪寺募緣捨田施主名銜 篆文字徑四寸餘

第一列

前中間以□□□蕩老衆例被毀掘力陳

上司乞行看驗實係古田復得圓備所歷艱辛不可
具述皆荷 施主借貸捨施成此二莊於內每年撥
田壹伯畝租課給與名次行者剃度爲僧所集勝利
上報

國恩下資 檀越開具名銜以傳不朽
清熙甲辰八月朔丁巳日餘置莊田前監寺僧慧智謹誌

助緣住持嗣祖釋慧寶立石

第二列

秉義郎□州□轄衛兵趙彥同妻嚴□□名智宗施
錢拾貫文

周氏□□□同男康安世捨金壹兩追薦亡夫康七
三助教超生佛界

祖東京邢詠□弟詮妹邢三娘家眷等捨錢拾貫文
薦考邢十郎妣王氏二娘生天界

秉義郎吳佐捨錢叁拾貫文

從義郎□□充兩浙東路准備將婺州駐劄趙不施
捨錢伍貫文

臨安府北關王大亨捨施壹伯貫文

進武校尉范彥璋 彥宗 彥顯同母親沈氏六娘

捨錢壹伯貫文

守吉州助教曹□□捨錢伍拾貫文

徐偁將母親身後衣物□□□貫□

平江府鄭偁捨錢叁拾貫文

女弟子朱氏□娘將亡夫徐百三學諭遺下衣服捨

錢叁拾貫文

將仕郎沈藻捨米壹拾碩

將仕郎姚大方捨錢壹拾貫文

賈謙捨錢壹拾貫文

高夏宜捨錢壹拾貫文

姚允功捨錢壹拾貫文

錢忠孝捨錢壹拾貫文

第三列

唐照同妻劉氏捨錢伍貫文

陳元桂捨錢伍貫文

居儼捨錢伍貫文

朱仁福捨錢伍貫文

陳榮捨錢伍貫文

正安雅捨錢伍貫文

莫珪捨錢伍貫文

沈成憲捨錢伍貫文

沈瑜同妻胡氏八娘捨錢伍貫文

沈京并妻周氏一娘捨錢伍貫文

□湛同妻姚氏五十娘捨錢伍貫文

張震捨錢伍貫文

錢林坊盛旦捨錢伍貫文

王興權捨錢伍貫文

姚琮捨錢伍貫文

施友直捨錢伍貫文

吳澤□□□貫文

第四列

沈伯

闕下

沈孚□□

闕下

將仕郎呂晉捨錢□□□

方炳捨錢伍貫文

王新捨錢伍貫文

將仕郎沈椿年捨錢伍貫文

吳元孫捨錢伍拾貫文買新田增裹功德報薦祖先

生界

吳揖拾錢壹拾貫文

費口顯口大莘拾錢壹拾貫文追薦先妣王氏十二
娘子

法屬比丘慧榮在日借過銀子伍兩遷化回施助緣

比丘思口拾錢壹拾貫文

比丘思欽拾錢壹拾貫文

比丘思實拾錢壹拾貫文

比丘思澄拾錢伍貫文

比丘義忠拾錢伍貫文

比丘清顯捨錢伍貫文

比丘惠常捨錢伍貫文

第五列

比丘景賢捨錢伍貫文

右碑連額高六尺五寸廣二尺三寸五分十九行
行五十四字正書碑陰凡五列行字不等額四字
篆書二行兩浙金石志湖州府胡承謀志李堂志
鄭元慶湖錄董斯張吳興備志及同治新修湖州
府志皆未著錄光緒中重建天甯寺于土中掘得
已缺一角劉一止字行簡歸安人七歲能屬文宋

史三百七十八有傳箸有茗溪集三十六卷此文
載集中碑石缺處今以集本註于旁